

書史會要

二

(共4冊)

卷之四

七

書史會要卷之四

南村處士陶宗儀九成著

宋

武帝

劉氏諱裕字德興彭城人漢楚元王廿一世孫

晉封宋公受禪稱帝英傑有大度書法雄逸

文帝

諱義隆武帝第三子博涉經史善隸行草書評

者謂如蕞裏花紅雲間日白

孝武帝

諱駿字休龍文帝第三子神明爽發才藻甚

美馳聲翰墨

明帝

諱彧字景休

一作炳

文帝第十一子好讀書才學

之士多蒙引進善書

南平王鐔字休玄文帝第四子少好學有文才書體
結構老成

海陵王休茂文帝第十四子長於用筆結字短於精
神骨力

蕭思話南蘭陵人官至征西將軍丹陽尹工隸行草
初學書於羊欣下筆繇密娉婷當時有鳬鷗鴈鶩
遊戲沙汀之比至于行草之工則有連岡盡望執
不斷絕之妙其風流媚好殊不在羊欣下故蕭行
范篆羊真孔草所以著論於袁昂也

王曇首瑯琊臨沂人太保弘之弟官至侍中幼而素
尚兄弟分財曇首唯取圖書而已沈毅雍容其作

草字雖未足以與古人方駕而行筆痛快亦自有可觀者

羊欣字敬元泰山南城人官至中散大夫該博經史長於隸書父不疑為烏程令欣年十二頗為王獻之所知方時獻之為吳興太守嘗因夏月入縣值欣晝寢著新練裙獻之書裙數幅而去既覺視裙書有得欣本工書因此弥善當時謂獻之之後可以獨步故諺曰買王得羊不失所望而論者謂欣學獻之終不能度越獻之規矩使灑落奔放自成一家故有婢作夫人之諺以其舉止羞澀終不似真欣嘗誤續筆陣圖一卷古昔能書人名一卷

謝靈運

陳郡陽夏人晉車騎將軍玄之孫官至侍中

臨川內史博總群書學王獻之真草俱造其妙或謂獻之靈運舅也故其得法為精凡獻之所上表章多在中書雜事中靈運臨模亂真因以已所書易其本人莫能辨然稍有知者後至元嘉中有司就索始進上作草字尤為人所推與有評其書者謂如石色松幹吹翕風雲簸蕩川岳則清雄可見也然蕭散氣韻則恐此不能盡之徒能狀其奔駭

薄紹之

字欽叙

敬叔作

丹陽人官至給事中善隸草行

書初學王獻之綽有風格其作草字至自得處則馳騁步驟光采發越照映四坐然論其書者乃謂

骨力尤雅何哉至梁袁昂評其字執則謂如舞女
低要僂人遠唱以是言之則必以婉麗清閒為主
矣安得發越照映如前所云然終繼之乃云揮豪
振紙若疾閃飛星婉麗清閒所以論其常而發越
照映所以言其變此心畫之妙兼得乎為人耳梁
武帝謂其亦有一家風氣未為冠絕

孔琳之字彥琳會稽山陰人官至祠部尚書好文博

古作隸行草度越流輩議者以謂飛流垂執則呂
梁之水焉二王已後畧無其比王僧虔亦謂琳之
書天然絕逸極有筆力蓋其所養豪放耻事遲拙
故筆端流暢快健若不凝滯於物或以謂功夫少

此又責備春秋之法也

宗炳

字少文

文史以作字宗炳

南陽涅陽人高尚不仕善書

謝方明

陳郡人

惠連父官至會稽太守書法寬和穩

媚

王藻

琅邪臨沂人官至東陽太守工行草

張裕

字茂度吳郡人名與武帝諱同故以字稱官至

會稽太守素有吏能書法清逸

張永

字景雲裕之子官至征北將軍涉獵書史善隸

書守家傳之規

王裕之

字敬弘琅邪人名與武帝諱同故以字行官

至侍中左光祿大夫翰墨約古任逸

王思玄

琅邪人官至南康太守書穩厚而無法度淳

和而蓄鋒鏑

顏竣

字士遜琅邪人官至東揚州刺史早有文義墨

迹亦妙

垣護之

字彥宗畧陽垣道人官至豫州刺史倜儻不

拘小節書神凝筆遲

駱簡

字正祖丹陽人官至鉅野令書宗王獻之深入

閭域

龐秀之

不知何許人官至江州刺史書宗二王

巢尚之

字仲遠魯國人官至寧朔將軍書法企孔琳

之之墻仞遵張茂度之軌躅

裴松之字世期河東聞喜人官至國子博士太中大

夫博覽墳籍書叅郗愔之章法得羊欣之筆意

徐爰字長玉琅邪開陽人本名瑗避傅亮諱除玉官
至中散大夫書神閒態穠

徐希秀爰之子官至驃騎將軍淮南太守甚有學解
亦閒篆隸正書謹促有度草則拘檢梁武帝謂其
書如南岡士大夫徒尚風範不免寒乞也

江僧安陳留人官至太子中庶子書健利輕媚

賀道力會稽人官至吳興令草書圓轉不窮

謝綜范曄之甥書緊潔生起實為得賞

謝靜善寫經亦入能境

范曄字蔚宗順陽人泰第四子官至太子詹事以謀逆伏誅善為文章師羊欣工草隸

張越善書評者謂如蓮花出水明月開天露發金峯雲低玉嶺

張斯善書梁武帝謂如辨士對敵獨語不回得必會理

傅操一作玉善書評者謂如金花細落徧地玲瓏荆玉分輝瑤岩璀璨

朱齡石字伯兒沛郡人官至雍州刺史弟**超石**官至中書侍郎兄弟並閒尺牘

謝莊字希逸秣陵人晉刺史萬之玄孫官至右光祿

大夫善書

謝晦字宣明陳郡陽夏人官至荊州刺史涉獵文義善書

王弘字休元琅邪臨沂人晉丞相導之曾孫官至太保中書監以清悟知名工於書翰人皆法之

王徽字景元弘弟孺之子官至中書侍郎好學工書

張暢字少微吳郡人官至會稽太守有操行工書

周顒字彥倫汝南安成人隱鍾山後仕齊官至國子博士復欲歸隱孔稚圭作北山移文嘲之工行草

兼得晉衛恒散隸法

戴顒字仲若晉徵士逵之子元嘉中徵並不起父善

琴書顯並傳之

王道邈

吳興烏程人涉學善書

蕭惠基

思話之孫官中書黃門郎後入齊官給事中

善隸書

徐羨之

字休文東海郟人在晉為丹楊尹入朝官至

司空亦善書

羊詒

盧循

並善草書

戴延壽

會稽山陰人善書

孫奉伯

善書

史陵

工隸行

齊

高帝

蕭氏諱道成字紹伯南蘭陵人宋封齊公受禪

稱帝博學善屬文工隸草書嘗謂王僧虔曰我書

何如對曰臣真書第一草書第二陛下真書第二
草書第三陛下無第一臣無第三又與僧虔賭書
誰為第一奏曰臣書臣中第一陛下書帝中第一
武帝諱贗字宣達高帝長子剛毅有斷工行草嘗觀
落英茂木作瑞華書為辭紀之黃門侍郎何胤明
於圖緯以為木德之瑞纂其辭箴之王府凡若此
類亦象形也

臨川王

映字宣光高帝第三子美容止工左右書

武陵王

彞字宣昭高帝第五子工篆法

始興王

鑑字宣徹高帝第十子性聰敏能書有蘭陵

帖宋高宗嘗跋之

江夏王

鋒字宣穎高帝第十二子性方整年五歲即

工鳳尾諾因無紙繼日畫窓塵以學書

竟陵王

子良字雲英武帝第二子聰敏善書

蕭鈞

字宣禮高帝第十一子繼衡陽王道度後歷位

祕書監亦工書嘗蠅頭細書五經一部置於巾箱

王僧虔

琅邪臨沂人宋侍中曇首子官至尚書令謚

簡穆曾祖洽以書稱于時至僧虔家傳之學不墜
作草隸甚工初法王獻之而尤尚古直若溪澗含
冰崗巒被雪雖極清肅而比之獻之風流蘊藉則
所不逮或曰虎爪書僧虔擬王羲之龍爪而作以
龍爪形用縈婉因加稜角為虎爪之勢梁武帝評

僧虔書謂如王謝家子弟縱復不端正奕奕有一種風流氣骨

王慈字伯寶僧虔子官至侍中冠軍善行書謝超宗見慈學書謂慈曰卿書何如僧虔慈荅曰慈書與大人猶雞之比鳳蓋超宗即鳳之子也超宗慚退而

劉珉字仲寶彭城人官至三公郎中書法自王氏羲獻父子以來其道浸以衰陋至齊尤甚珉喜草隸遂能一洗俗學之譌遠追羲之頗得其法落筆佳處徃徃凌轢古人至草益勝論者有海岳高深青分孤島之比

宗炳

字敬微宗炳之孫代居江陵不應召辟喜書畫

劉係宗

丹楊人在宋為景陵王子景粹侍書入朝為

東宮侍書官至寧朔將軍宣城太守自少便

知書畫

謝惠連

陳郡陽夏人官至司徒府參軍幼有詞學族

兄靈運歎伏之書畫並妙

張融

字思光吳郡人官至司徒左長史工行草效二

王自謂不恨已無二王法乃恨二王無已法

謝朓

史作朓

字玄暉陳郡人官至尚書吏部郎少好學

文章清麗以草隸名當時結字高雅評者謂其若

薄暮川上餘霞照人

劉繪

字士章彭城人官至大司馬從事中郎雅有風

則梁庾肩吾論云謝朓劉繪文宗書範近來少前